

Lo evalua premisonan pa cu traficacion di hende

ORANJESTAD - Tin un comision cu ta evaluando tur aspectonan di prostitucion na Aruba pa asina bin cu miho regla pero tambe un miho protection pe trahadonan den e sector aki. Un factor cu ta hunga un rol ta e permisonan, pa 'animeermeisje' y tambe otro tipo di trabou, den e combatimento di traficacion di hende. Esaki Coordinador Nacional di Task Force Aruba contra Traficacion di Hende, Jeanette Richardson-Baars, a divulga den un entrevista cu Bon Dia Aruba. Den e edicion di 30 april ya a skirbi cu tin un discusion andando den e comision/Taskforce ki rol un permiso ta hunga den e parti di "debt-bounding". Locual ta nifica cu un trahado di afo ta core riesgo pa bira mucho dependiente di su dunado di trabou pa motibo di permiso. E dunado hopi biaha ta paga pe biahe y garantia pe permiso y por uza esaki como un instrumento di presion. Esaki por ta un manera cu por conduci na mas casonan di traficacion di hende.

Animeermeisje

Den e sector di servicio sexual ta traha hopi extranheronan cu ta haya un permiso di 'animeermeisje' pa tres lunanan. E nomber a bin e tempo cu prostitucion ainda tabata prohibi na Aruba. A puntra dicon ta yam'e asina y sra. Baars ta contesta cu e tempo cu nan a cuminsa, prostitucion ainda tabata prohibi. Gobierno dificilmente por duna un permiso pa algo cu ainda tabata ilegal, e ta splica. "Pero awendia esaki no ta e caso mas, pues laga nos yam'e manera e ta, un permiso pa prostituta of trahado di sex." E motibo cu e permiso ta solamente pa un temporada di tres luna, ta cu antes nan kier evita cu e contact entre Rubianonan y prostitutanen di afo por bira mas profundo, e coordinador ta sigui splica. "Nan kier a evita cu Rubianonan lo enamora di nan si e hende muhenan lo a keda mas tempo." Si e regla aki mester cambia of no, ta algo cu ta forma parti di e discusion tambe, sra. Baars ta bisa. Mester evalua con e derechonan laboral ta regla p'e grupo di trahadonan aki. No ta mucho conoci, e ta bisa, kico ta regla y pa futuro basicamente mester wak si e mesun leynan laboral cu ta conta pa otro sectronan awor, lo aplica pe sector aki tambe. Y si por ehemplo e trabou lo wordo reconoce como un profesion manera na Hulanda, pues lo nifica cu nan tambe mester paga impuesto etcetera. Sra. Baars ta bisa cu

esaki no ta un discusion cu ta andando solamente na Aruba, pero tambe na e otro islanan den Reino. E Taskforce ta traha hunto cu tur pais den Reino den e combatimento di traficacion di hende. Nan ta comparti informacion y tambe conocimiento pa mehoracion. E coordinador ya a splica Bon Dia Aruba den e edicion di 30 april cu no mester pensa cu den e sector di prostitucion na Aruba lo tin hopi mas traficacion di hende compra cu den e otro sector-

nan. Esun di cria, bibando den e cas di e dunado di trabou, a resulta cu tambe ta core hopi riesgo. E echo cu e 'animeermeisje' mester paga e barnan por ehemplo na San Nicolas, no necesario kermen cu nan ta dependiente di e doño di e barnan. Tanten e sumanan cu nan mester paga e barnan pa un camber y otro serviconan ta razonabel, no por papia di traficacion, segun sra. Baars. **Circulacion** E sistema cu e grupo aki ta keda 3 luna na Aruba, pa sigui bay otro

paisnan den region pa mesun periodo cortico, tam poco kermen cu e grupo aki ta automaticamente victima di traficacion. Pero por kita esaki pafu tampoco, segun e coordinador, ya cu nan no tin suficiente informacion si por ehemplo tin un organisacion atras di e circulacion di e hende muhe aki den region. A puntra finalmente sra. Baars si no ta bira tempo pa cambia e nomber anticua di 'animeermeisje' riba e permiso, pa motibo tambe cu prostitucion no

ta prohibi mas y por haya un otro impresion tambe di kico ta un animeermeisje. "Personalmente ami ta sostene un otro nomber y yam'e manera cu e ta. No tin nada robes cu un prostituta. E ta un hende normal cu ta duna un cierto servicio." Na e ultimo eleccion e corant Amigoe a puntra e partidonan politico si nan ta haya cu mester prohibi prostitucion. Tur e partidonan participante a bisa si, mester prohibi, solamente partido RED tabata contra. □